



Jadual Pembacaan Khutbah Jumaat

Siri 12/ 2023 (Disember Tahun 2023)

تاریخ	تاجوق	ب
1 Disember 2023M/ 18 Jamadil Awwal 1445H	Pembangunan Lestari, Nikmatnya Disyukuri	1.
8 Disember 2023M/ 25 Jamadil Awwal 1445H	Tunaikanlah Zakatmu	2.
15 Disember 2023M/ 2 Jamadil Akhir 1445H	Menginsafi Hikmah Musibah	3.
22 Disember 2023M/ 9 Jamadil Akhir 1445H	Siapa Lelaki Sejati?	4.
29 Disember 2023M/ 16 Jamadil Akhir 1445H	Sediakan Payung Sebelum Hujan	5.
Khutbah Kedua		

دبیایاء:



زكاة فولاو فینغ

دتریبتکن:



جابتن حال إحوال اکام اسلام فولاو فینغ



Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



Siapa Lelaki Sejati?

22 Disember 2023M/ 9 Jamadil Akhir 1445H

الْحَمْدُ لِلَّهِ الَّذِي أَكْرَمَ الرِّجَالَ بِالإِسْلَامِ، وَأَعَزَّهُم بِالطَّاعَةِ وَالْإِيمَانِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، جَعَلَ السَّعَادَةَ فِيْمَنْ أَطَاعَهُ
وَاتَّبَعَ رِضَاهُ، وَأَشْهَدُ أَنَّ نَبِيَّنَا مُحَمَّدًا رَسُولُ اللَّهِ، وَخَلِيلُهُ مِنْ خَلْقِهِ
وَمُصْطَفَاهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحَابَتِهِ وَمَنْ نَصَرَهُ وَوَالَاهُ.
وَبَعْدَ؛ فَيَا عِبَادَ اللَّهِ، اتَّقُوا اللَّهَ أَوْصِيَكُمْ وَنَفْسِي بِتَقْوَى اللَّهِ فَقَدْ فَازَ الْمُؤْمِنُونَ
الْمُتَّقُونَ.

SIDANG JUMAAT YANG DIRAHMATI ALLAH SEKALIAN,

Tidak ada nasihat paling agung yang ingin diseru daripada atas mimbar yang mulia ini, melainkan untuk mengajak semua muslimin untuk meningkatkan ketakwaan kepada Allah dengan mentaati segala perintah-Nya dan meninggalkan segala perkara yang dilarang oleh Allah. Semoga kita beroleh ketakwaan yang sebenar-benar di sisi Allah **سُبْحَانَهُ وَتَعَالَى**.

Di samping itu, khatib ingin mengingatkan sidang Jumaat sekalian agar memberikan fokus dan mendengar serta menghayati khutbah Jumaat



ini, jangan berbual-bual, tidak leka bermain gajet, melayan mesej *Whatsapp*, *Facebook*, *Tiktok* dan sebagainya kerana ia boleh mencacatkan pahala Jumaat. Marilah kita bersama-sama menghayati khutbah yang bertajuk: **“Siapa Lelaki Sejati?”**

MUSLIMIN YANG DIKASIHI SEKALIAN,

Seringkali kita salah faham tentang apakah yang dimaksudkan sebagai lelaki. Ada yang menganggap badan yang sasa, kemewahan, kekayaan dan populariti sebagai lambang lelaki sebenar. Namun Islam mempunyai pandangan berbeza bagi menentukan siapa lelaki sebenar.

Andai badan yang sasa menjadi ukuran dan simbol lelaki sejati, pasti kaum munafiqin mengungguli gelaran tersebut. Wajah yang tampan, badan yang sasa dan kepetahan berbicara persis seorang lelaki yang berkarisma ialah ciri utama kebanyakan munafiqin di zaman Rasulullah ﷺ.

Firman Allah ﷻ dalam surah al-Munafiqun ayat 4:

وَإِذَا رَأَيْتَهُمْ تُعْجِبُكَ أَجْسَامُهُمْ وَإِنْ يَقُولُوا تَسْمَعُ لِقَوْلِهِمْ كَأَنَّهُمْ خَشَبٌ مُّسْتَنَدٌ يَّحْسَبُونَ

كُلَّ صَيِّحَةٍ عَلَيْهِمْ هُمُ الْعَدُوُّ فَاحْذَرُهُمْ قَتَلَهُمُ اللَّهُ أَنْى يُؤْفَكُونَ ﴿٤﴾

Maksudnya: *“Dan apabila kamu melihat mereka, kamu kagum dengan tubuh badan mereka (dan kelakuan mereka). Jika mereka berkata-kata, kamu akan tertarik mendengar tutur kata mereka (kerana manis dan fasih). (Dalam pada itu) mereka seakan-akan kayu yang tersandar (tidak terpakai kerana*

tidak ada padanya kekuatan yang dikehendaki). Mereka (berasa bersalah dan sentiasa dalam keadaan cemas sehingga) menyangka setiap jeritan ditujukan kepada mereka (untuk membahayakan mereka). Mereka itulah musuh (yang sebenarnya) maka berwaspadalah terhadap mereka, semoga Allah membinasakan mereka. (Pelik sungguh!) Bagaimanakah mereka dapat dipalingkan (oleh hawa nafsu mereka daripada kebenaran)?”

Imam Al-Baghawi menyebut di dalam tafsirnya, Ibnu Abbas رَضِيَ اللَّهُ عَنْهُ menyatakan bahawa Abdullah bin Ubai, ketua munafiqin Madinah merupakan seorang yang tegap tubuhnya, tampan wajahnya dan begitu mempersona ketika berbicara. Andai sekiranya seseorang melihat penampilan dan cara mereka berbicara, pasti tidak akan terlintas, itu sebenarnya golongan yang sangat dimurkai oleh Allah سُبْحَانَهُ وَتَعَالَى.

MUSLIMIN YANG DIRAHMATI ALLAH,

Namun begitu, penampilan mereka hanya mampu mengagumkan sebahagian masyarakat. Hakikatnya golongan ini tidak lebih seperti sebatang kayu yang tersandar di dinding. Bagi mereka yang dangkal akalnya, pasti akan mengagumi kayu tersebut kerana menganggap sangat besar jasanya sehingga menahan dinding dari rebah. Tetapi bagi yang bijaksana pasti akan mengetahui kayu tersebut tiada sebarang nilai dan peranan. Hanya menunggu masa untuk reput dan binasa. Demikian analogi al-Quran bagi menyatakan nilai lelaki sebenar dalam pandangan Islam. Ketika seorang sahabat Abdullah bin Mas'ud رَضِيَ اللَّهُ عَنْهُ yang memiliki tubuh badan yang kecil, hendak mengambil ranting untuk dijadikan kayu sugi,

datang angin lalu menyingkap sebahagian betisnya. Para sahabat tertawa melihat betis Abdullah bin Mas'ud yang kecil dan kurus. Rasulullah ﷺ bertanya: “Apa yang membuat kamu tertawa?” Mereka berkata, “Wahai Rasulullah ﷺ, kerana kedua betisnya yang kurus.” Rasulullah ﷺ lantas bersabda: “Demi zat yang jiwaku berada di tangannya, sesungguhnya kedua betis itu lebih berat timbangannya daripada gunung Uhud.”

﴿Hadis Riwayat Imam Ahmad﴾

MUSLIMIN YANG DIRAHMAT ALLAH,

Mimbar menggariskan 3 ciri utama bagi lelaki sebenar menurut kaca mata Islam:

Pertama: Lelaki yang sentiasa terpaut hatinya dengan masjid.

Firman Allah ﷻ dalam surah at-Taubah ayat 108:

فِيهِ رِجَالٌ يُحِبُّونَ أَنْ يَتَطَهَّرُوا وَاللَّهُ يُحِبُّ الْمُطَهَّرِينَ ﴿١٠٨﴾

Maksudnya: “Di dalam masjid itu, ada ramai orang lelaki yang suka (mengambil berat) membersihkan (menyucikan) diri mereka. Dan (ingatlah), Allah mengasihi orang yang membersihkan diri mereka (zahir dan batin)”

Lelaki sebenar adalah ketika hati dan jiwanya rindu untuk sentiasa berada di masjid. Jiwa keahambaannya semakin terserlah apabila saban

waktu dan ketika menjadikan masjid sebagai destinasi utama dalam kehidupan. Lelaki yang sebenar juga sentiasa membersihkan diri dan hati mereka daripada dosa.

Kedua: Lelaki yang tidak meninggalkan solat demi kepentingan dunia.

Firman Allah dalam surah an-Nur 37:

رَجَالٌ لَا تُلْهِيمُهُمْ تِجَارَةً وَلَا بَيْعٌ عَنْ ذِكْرِ اللَّهِ وَإِقَامِ الصَّلَاةِ وَإِيتَاءِ الزَّكَاةِ يَخَافُونَ يَوْمًا

تَتَقَلَّبُ فِيهِ الْقُلُوبُ وَالْأَبْصَارُ ﴿٣٧﴾

Maksudnya: “(Ibadah itu dilakukan oleh) orang yang tidak dilalaikan oleh perdagangan dan jual beli daripada mengingati Allah, mendirikan solat dan menunaikan zakat. Mereka takutkan Hari Kiamat yang padanya berbolak-balik hati dan pandangan.”

Lelaki sebenar adalah ketika perniagaan dan kemewahan tidak pernah melalaikannya dari menunaikan solat lima waktu dan berzikir mengingati Tuhan. Solat menjadi keutamaannya di dalam setiap tindakan dan aktiviti sehariannya.

Ketiga: Lelaki yang menepati janjinya dengan Allah **سُبْحَانَهُ وَتَعَالَى**.

Firman Allah di dalam surah al-Ahzab ayat 23:

مِّنَ الْمُؤْمِنِينَ رِجَالٌ صَدَقُوا مَا عَاهَدُوا اللَّهَ عَلَيْهِ فَمِنْهُمْ مَّنْ قَضَىٰ نَحْبَهُ وَمِنْهُمْ مَّنْ يَنْتَظِرُ
وَمَا بَدَّلُوا تَبْدِيلًا ﴿٦٣﴾

Maksudnya: “Antara orang yang beriman itu ada orang yang menunaikan apa-apa yang telah dijanjikan mereka kepada Allah (untuk berjuang membela Islam). Maka ada juga antara mereka yang telah selesai melaksanakan janji mereka (lalu gugur syahid) dan ada antara yang menunggu giliran dan mereka tidak mengubah (apa-apa yang telah dijanjikan oleh mereka itu) sedikitpun.”

Lelaki sebenar menurut Islam pasti akan memelihara setiap kewajipan yang digariskan syarak. Tidak lalai dari menunaikan semua arahan Allah **سُبْحَانَهُ وَتَعَالَى** dan sentiasa menjauhi segala tegahan-Nya. Lelaki yang sebenar tidak pernah menganggap urusan agama sebagai perkara remeh dalam kehidupan bahkan sentiasa hidup berpaksikan wahyu Allah.

MUSLIMIN YANG DIRAHMATI ALLAH **سُبْحَانَهُ وَتَعَالَى,**

Ayuh persiapkan diri menjadi lelaki yang digariskan oleh Al-Quran. Lelaki yang hakiki membina kekuatan diri. Berdiri atas keimanan hakiki. Memiliki jati diri bersendikan sunnah sejati bukan sekadar bertanjak rapi tetapi malang, hilang identiti. Bukan hanya bersuara lantang lagak pejuang tapi sayang solat lima waktunya tak pernah kunjung datang.

Lelaki sejati berakhlak mulia, tidak sombong dan menghina walau kekayaan melimpah. Contohilah lelaki sebenar seperti sahabat Nabi di

zaman salaf, berjuang mempertahankan agama walau senjata bersilang terhunus ke muka. Pertahankan agama walau badan bercalar, diluka pedang musuh durjana.

MUSLIMIN RAHIMAKUMULLAH,

Sebagai kesimpulan dari khutbah pada hari ini, mimbar menggariskan 3 elemen penting sebagai bekalan dan panduan jemaah:

Pertama: Jadilah lelaki yang hakiki, memiliki jatidiri bersandarkan ajaran Islam berpandukan Al-Quran dan Sunnah.

Kedua: Meyakini pandangan dan penilaian Allah ﷻ terhadap hamba-Nya ialah pada hati bukan pada luaran atau fizikal.

Ketiga: Sentiasa menjaga solat lima waktu secara berjemaah sebagai lambang lelaki sebenar.

أَعُوذُ بِاللَّهِ مِنَ الشَّيْطَانِ الرَّجِيمِ

قَالَ الْقُرْآنُ الْمَجِيدُ ① بَلْ عَجِبُوا أَنْ جَاءَهُمْ مُنْذِرٌ مِنْهُمْ فَقَالَ الْكَافِرُونَ هَذَا شَيْءٌ عَجِيبٌ ② أَوِ إِذَا مِتْنَا وَكُنَّا تُرَابًا ذَلِكَ رَجْعٌ بَعِيدٌ ③ قَدْ عَلِمْنَا مَا تَنْقُصُ الْأَرْضُ مِنْهُمْ وَعِنْدَنَا كِتَابٌ حَفِيظٌ ④ بَلْ كَذَّبُوا بِالْحَقِّ لَمَّا جَاءَهُمْ فَهُمْ فِي أَمْرٍ مَرِيجٍ ⑤

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ، أَقُولُ مَا
سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ، إِنَّهُ
هُوَ الْغَفُورُ الرَّحِيمُ.



Khutbah Kedua Bulan Disember

2023M/ 1445H

الْحَمْدُ لِلَّهِ عَلَى آلَائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾
[الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نَبِيِّ الْبَشَرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Khatib juga mengambil kesempatan ini untuk menyeru para jemaah sekalian agar terus memberikan sokongan padu tanpa berbelah-bagi kepada penduduk Palestin yang sedang dizalimi oleh Regim Zionis melalui serangan tanpa henti di Gaza dan Tebing Barat.

Kita mungkin tidak mampu mengangkat senjata, tetapi kita masih mempunyai kekuatan daripada aspek kewangan. Infakkanlah sebahagian



rezeki untuk membantu mereka yang ketika ini berada dalam keadaan yang amat menyedihkan serta menjalani kehidupan yang sukar. Selain itu, gunakanlah senjata paling ampuh yakni DOA. Semoga Allah **سُبْحَانَهُ وَتَعَالَى** menganugerahkan kejayaan, keselamatan dan kesejahteraan buat seluruh umat Islam serta rakyat Palestin khususnya. Semoga bumi Palestin kembali aman dan makmur di bawah rahmat Allah **سُبْحَانَهُ وَتَعَالَى**.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْعَلَاءَ وَالرِّيَاءَ، وَالرِّبَا وَالزَّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً
يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٥﴾